



# Cumün da Valsot

Tel. +41 (0)81 861 00 60 • Fax +41 (0)81 861 00 61 • info@valsot.ch • www.valsot.ch

Poz 86 • CH-7556 Ramosch

Protocol

## Radunanza cumünala dals 17.12.2015

Presidi: Peer-Puorger Victor

Preschaint: 76 votantas e votants

S-chüsà: Leta Steck-Rauch, Rico Kienz

Scrutinadurs: Plasch Oswald e Steivan Martinelli

Protocol: Luzzi-Barblan Georg

---

tractandas	tema	responsabel
------------	------	-------------

---

- |    |   |  |
|----|---|--|
| 19 | 011 Legislativa<br><b>Acconsentimaint protocol</b>  |  |
| 20 | 020 Administraziun cumünala<br><b>Preventiv 2016</b><br>Quint curraint 2016                 |  |
| 21 | 020 Administraziun cumünala<br><b>Preventiv 2016</b><br>Quint d'investiziun 2016            |  |
| 22 | 942 Stabels da la facultà da finanzas<br><b>Vendita da terrain illa zona da mansteranza</b> |  |
| 23 | 011 Legislativa<br><b>Varia (radunanza cumünala)</b>  |  |

011 Legislativa  
19 **Acconsentiment protocol**

Il capo salüda a tuots preschaints, in special a la mainascoula duonna Gianna Rauch Poo e sar Nicolo Bass da la pressa. Il protocol vegn acconsenti cun gronda majorità.

020 Administraziun cumünala  
20 **Preventiv 2016**  
Quint curraint 2016

Il capo repassa il quint curraint. El manzuna las posiziuns importantas da mincha gestiun. Las votantas e votants han tanteraint la pussibilità da far dumondas sur dal tema. Il quint curraint prevezza sortidas da fr. 9'728'200.00 ed entradas da fr. 11'063'300.00 resulta ün guadogn previs da fr. 1'335'100.00. Il cumün prevezza d'amortisar totalmaing fr. 1'307'100.00, resulta ün cash flow da fr. 2'642'200.00. La radunanza cumünala accepta il quint curraint 2016 cun gronda majorità.

020 Administraziun cumünala  
21 **Preventiv 2016**  
Quint d'investiziun 2016

Il quint d'investiziun 2016 prevezza sortidas da fr. 3'619'700.00 ed entradas da fr. 1'050'900.00, resulta investiziuns nettas da fr. 2'568'800.00. Ils progets relevants pel on 2016 sun, la sanaziun da la via Bügl Grond – Plaz a Vnà, la sanaziun da l'infrastructura Stradella a Vnà, la sanaziun Alp Tea Sot a Tschlin, il proget da sanaziun da las vias da god, il rinch da maschinas forestal, la halla da pumpiers a Ramosch, autos da pumpiers ed il proget da vias da meglioraziun a Ramosch. Il capo infuorma detagliadamaing sur da tuot ils progets cha'l cumün prevezza da realisar. Implü dà il manader tecnic infuormaziuns detagliadas, impustüt quai chi's tratta da la halla da pumpiers cun integrà ün local per cultura a Ramosch ed ün suost per la gruppa da lavur. Plünavant vegn orientà sur dal concept da parcar per tuot il cumün da Valsot.

Sar Georg Caviezel dumonda cur chi'd es previs da realisar il proget dal provedimaint d'aua a Martina. Il capo piglia posiziun e manzuna cha la cumischiun da planisaziun es actualmaing landervia ad elavurar ils progets. Tuot il GEP da Tschlin es d'incuort gnü suottamiss al chantun. Duri Janett salüda cha'l cumün prevezza da refar l'alp Tea Sot, el manzuna chi füss salüdaivel schi's chattess üna soluziun per tour a nüz las localitats da la stalla.

Cla Duri Janett piglia il pled a regard il tema « rinch da maschinas ». Sia ditte es l'unica impraia forestala illa regiun perquai as ha el preoccupà in detagl sur da quista chosa. Tenor el nun esa mai gnü tscherchà sinergias i'l sector forestal, el es implü gnü infuormà relativ tard sur da quist intent. Inavant manzuna'l che maschinas chi sun previsas da cumprar. El d'eira gnü infuormà, davart dals silviculturs, chi nun es previs da cumprar ün bagger, uossa sto el constatar chi vegn listess investi in ün bagger. El manzuna inavant co cha'l Chantun subvenziunescha las maschinas forestalas. Per finir ha el constatà, cha'ls tagls dal cumün da Valsot sun gnüts publichats aint il fögl uffizial. El es dischillus sur da quist fat, impustüt causa cha sia ditte es domiciliada a Valsot. El giavüscha davart da la radunanza che per ün maniamaint ch'els han in quista chosa. Il capo piglia posiziun a regard il scriver oura publicamaing. Armon Mayer infuorma sur dal rinch da maschinas resp. sur da las investiziuns previssas. Nö be la ditte privata ha collavuratur indigens, eir il cumün ha collavuratur indigens e bsögnan lavur. Il cumün vuol far quistas investiziuns per gnir plü efficiant, sco chi'd es eir üsit pro dittas privatas. Per finir preschainta el l'organigram previs. El sperescha cha quist proget vegna sustgnü davart da la radunanza. Gisep Rainolter (silvicultur) manzuna las collavuraziun tanter ils cumüns, il concept dal rinch da maschinas chi funcziuna eir in otras regiuns, la quantità da giarsuns cha'ls cumüns instruischan, e relativescha ils pertschients manzunats chi sun previs da surdar a dittas privatas. Il capo infuorma chi fa dabsögn da far investiziuns per restar al curraint. Mias Camastral füss fich dischillus scha quist proget gniss acceptà, tenor el es quist üna concorrenza vers üna ditte indigena. Clà Duri Janett piglia posiziun a regard las publicaziuns il fögl uffizial. Il capo manzuna, cha lavurs subvenziunadas da la Confederaziun e dal Chantun ston per regla gnir scrittas oura (submissiun). Ils ultims ons nun esa quasi mai gnü scrit oura publicamaing. Schi vegn a la realisaziun da quist proget, uschè Cla Duri Janett, schi nu resta oter co da preverer da rafüdar cun sia impraia. Curdin Müller metta in dumonda la relaziun da lavurs tanter ün cumün e dittas privatas. Duri Janett spetta üna megldra collavuraziun tanter il cumün e las dittas privatas impustüt quai chi riguarda la scolaziun dals giarsuns. Corsin Casura dumonda scha'l rinch da maschinas vegn eir realisà scha Valsot nu piglia part. Gisep Rainolter infuorma cha tschels cumüns realiseschan p.c.f. listess il rinch da maschinas. Armon Mayer infuorma finalmaing cha cun quist proget nu's prevezza

da s-chaffir novas plazzas ma da mantegner quellas existentas. Il capo piglia posiziun e fa ün riassunt da quai manzunà, el propuona da laschar vuschar giò explicit per quist proget.

La votumaziun segua averta, causa cha damain da 25% dals preschaints giavüschan üna votumaziun in scrit. La radunanza decida cun 34 cunter 27 vuschs da sbütta l'investiziun da fr. 150'000.00 pel rinch da maschinas. Il capo infuorma cha las posiziuns « guadogn e prestaziuns » i'l quint curraint ston, sco consequenza, gnir strichadas pro'l revier forestal. La radunanza es cun gronda majorità daperüna da strichar quellas posiziuns.

Il capo proseguischa cul quint d'investiziuns. El infuorma a la radunanza chi sun entrats 39 recuors cunter il proget da realisar la tualetta in vicinanza da la favgia a Tschlin. La suprastanza propuona perquai da sbütta il proget resp. da nò resguardar plü aint il preventiv 2016.

Insembel culla realisaziun da la halla da pumpiers esa previs da realisar ün local da cultura per societats. Il manader tecnic infuorma in detagl sur dal proget. Riet Häfner infuorma ch'el nun es perinlet cun quist'investiziun. Il capo piglia posiziun perchè chi fa dabsögn da far quistas investiziuns, impustüt in colliaziun cul local per las societats. Armon Mayer piglia posiziun sco commember chi ha elavurà il proget pel corp da pumpiers. Jachen Kienz infuorma cha'l cumün ha fat tenor el il maximal our dal areal a Quadra Secha, inavant manzuna'l l'importanza da las societats in ün cumün resp. da nossa cultura. Georg Caviezel manzuna che investiziuns sun gnüdas fattas fin hoz il areal Quadra Secha, tenor el quist ün butschin sainza fuond. Sün quai muossa via il capo süllas entradas cha'l cumün ha cul areal Quadra Secha. Dumenic Häfner es da l'avis da strichar il local pellas societats.

Duri Janett manzuna ils problems d'üna società, el propuona da sustegner perquai la realisaziun da'l local per las societats culturalas. Per finir sustegna eir Mario Molinaro l'intent previs.

Plünavant manzuna il capo cha'l cumün nu varà da tour sü ingüns credits per far las investiziuns, causa cha'l cash flow es plü ot sco las investiziuns nettas. Georg Häfner giavüscha chi vegn integrà eir il proget per realisar la chasa dal « Bun Tschlin ». Il capo piglia posiziun in merit. Il concept sto il prüm gnir elavurà in detagl, deliberà da la suprastanza a man da la radunanza e pür lura dess gnir dumandà a la radunanza per ün credit. I segua üna votumaziun in merit. La radunanza refüsa cleramaing la proposta da Georg Häfner.

La radunanza accepta cun gronda majorità il quint d'investiziun 2016 sainza l'investiziun pel rinch da maschinas.

942 Stabels da la facultà da finanzas

## 22 **Vendita da terrain illa zona da mansteranza**

Il capo propuona da spostar quista tractanda sün üna prosma radunanza. La radunanza decida cun gronda majorità da far il spostamaint.

011 Legislativa

## 23 **Varia (radunanza cumünala)**

Il capo infuorma cha'l chanzlist, Georg Luzzi, rafüda davo 10 ons seis post sco chanzlist. Implü rafüda eir la manadra da finanzas Patricia Melcher, causa maternità. Ella ha lavurà 3 ons pel cumün da Valsot. El ingrazcha a tuots 2 per la fich buna ed agreabla collavuraziun. Sco chanzlist es gnü elet sar Marco Fallet e sco manadra da finanzas, duonna Patrizia Wieser. Men Notegen ed eir Benedict Denoth sustegnan la lavur dal cumün e da la suprastanza cumünala. Els spereschan cha'ls critikers sian in ün on pronts da s'ingaschar activmaing pel cumün. Il capo giavüscha a tuots üna bella saira, bunas festas da Nadal ed ün bun sglisch aint il 2016.

7556 Ramosch, 22.12.2015



Il capo:

Il manader administraziun: